

Dimensiuns immensas tar la nova praschun

Cazas/Realta: Nova praschun

DA GION NUTEGN STGIER / ANR

■ **Per il pli grond project da construcziun ch'il chantun ha gi fin ussa vegnan investids 119 milliuns francs. Da quella summa surpiglia la confederaziun 33 milliuns francs. Ier ha gi lieu la ventschida da la construcziun dal nov stabiliment giudizial serrà.** Oz è per il chantun in di allegraivel, ha ditg ier a Realta Mario Cavigelli, il schef dal departament da construcziun, traffic e selvicultura. In aspect plaschaivel saja er che la construcziun dal project saja fin ussa succedida tenor plan, er grazia a la buna lavur da las firmas da construcziun e dals lavurants diligents. In auter fatg positiv saja che er areguard las finanzas haja il chantun la survista duaivla, ed er quai che pertutga ils termins ins saja sin buna via, ha punctuà Cavigelli. Cun strusch avair en Svizra experientscha per la construcziun d'ina uschè gronda praschun saja vegni lavurà serius, professional ed er cun engaschament, ha accentuà il president da nosssa regenza.

Da gronda impurtanza per l'economia regionala

Christian Rathgeb, il schef dal departament da giustia, segirezza e sanadad, ha cunzunt fatg attent a l'impurtanza da la nova praschun per l'economia da la regiun. Grazia a la nova praschun survegnia la regiun 80 novas plazzas ed en tut sajan quai 110 posts da lavur cun surpigliar la



Dimensiuns immensas per la construcziun da la nova praschun a Cazas/Realta.

FOTO G. N. STGIER

praschun in pau emploiads da la praschun Sennhof a Cuir. Famiglias vegnan segir a prender dimora en la regiun cun avair il bab ubain la mamma lavur en la nova praschun. Ultra da quai profite-

schan ers blers furniturs da mangiativas dal nov stabiliment giudizial serrà da Realta. Rathgeb ha cunzunt er menziunà la buna collavuraziun cun las instanzas politicas da la regiun, dals auters chantuns

da la Svizra orientala che vegnan a pajar al chantun Grischun ina taxa per mintga delinquent da lur chantun che vegn en praschun a Realta. En tut porscha la nova praschun plaz a 150 delinquents.

In mir da 950 meters

La part centrala dal perimeter da segirezza exterior, il mir circumdant d'ina autezza da set meters e d'ina lunghezza da 950 meters, è er costruì. Grazia ad ina soluziun innovativa cun dus chars d'armadura mobils han pudì vegnir betunads 12,5 meters per di da lavur. Cun il grond mir circumdant duai d'ina vart vegnir impedì che praschuniers pon rumper or e da l'autra vart ch'ins ha invista da la praschun. Per integrar il betun opticamain en la prada, en las saivs vivas ed en ils ers circumdants è el vegnì maschadà levamain cun pigments da color.

Ina lunghezza da 220 meters

L'areal da la nova praschun ha ina grondezza da 50 000 meters quadrat, quai ch'èn set plazz da ballape. Il bajetg da la praschun, quel ha ina lunghezza da 220 meters ed ina larghezza da radund 25 meters. Las fanestras da mintga cella han ina otezza dad 1,80 meters ed ina larghezza dad 1,50 meters. La praschun vegn construìda tenor las ordinaziuns federalas e la grondezza da las cellas è er prescritta. Per la realisaziun dals trais bajetgs han ins duvrà 12 500 cubics betun, ditg auter 1250 camiuns cun betun. Per stabilisar ils objects han ins fatg diever da 1220 tonnas fier e montads èn vegnids tranter trais e quatter km cabels da tut gener. Sche tut va tenor plan duai la nova praschun esser a fin en il decurs da l'atun 2019.